

Os grupos políticos con representación na Deputación da Coruña (PP, PSdeG-PSOE, BNG-Asembleas Abertas, Marea Atlántica, Compostela Aberta e Alternativa dos Veciños), presentan a seguinte

## **DECLARACIÓN INSTITUCIONAL SOBRE A RETIRADA DOS TÍTULOS HONORÍFICOS E DISTINCIÓNS CONCEDIDAS POLA DEPUTACIÓN DA CORUÑA A FRANCISCO FRANCO BAAMONDE**

O 18 de xullo de 2016 cumpríronse 80 anos do golpe de Estado militar contra o réxime democrático vixente no Estado español, un levantamento militar que en Galicia foi orixe dunha cruenta e brutal represión, que se materializou no asasinato de máis de 5.000 persoas e noutras múltiples formas de violencia física: encarceramentos masivos, violacións, malleiras, rapado do cabelo, inxesta de aceite de ricino. Esta represión exerceuse con caracteres especialmente violentos e machistas no caso das mulleres.

Na provincia da Coruña, entre os centos de persoas que foron asasinadas, atópanse os seguintes cargos institucionais

- José López Bouza – Presidente da Deputación da Coruña – Paseado o 30-08-1936
- Ánxel Casal Gosende – Alcalde de Santiago de Compostela desde febreiro a comezos de xullo de 1936 e Vicepresidente da Deputación da Coruña – Paseado o 19-08-1936
- Xaime Quintanilla Martínez – Alcalde de Ferrol desde 1931 a 1934 e deputado Provincial – Paseado o 18-08-1936
- Juan Manuel Vidal García – Alcalde de Arzúa – Paseado en setembro de 1936
- Alfredo Suárez Ferrín – Alcalde de A Coruña – Condenado a morte e fusilado o 31-08-1936
- Tomás López Datorre – Alcalde de Betanzos – Condenado a morte e fusilado o 01-10-1936
- Álvaro Puentes Antón – Alcalde de Cabanas – Morto o 27-09-1940
- Manuel Fernández Freijeiro – Alcalde de Cedeira – Condenado a morte e fusilado o 18-12-1936.
- Ramón Souto González – Alcalde de Fene – Paseado o 16-08-1936
- Cipriano Fernández Brage – Alcalde de Fisterra – Paseado o 05-11-1936
- Jesús Castaño Galdo – Alcalde de Mañón – Condenado a morte e fusilado o 16-04-1937.
- Juan Prieto Balsa – Alcalde de Mugar dos – Fusilado o 24-07-1936
- Pablo Rico Couceiro – Alcalde de Monfero – Paseado o 19-08-1936
- Antonio Fernández Pita – Alcalde de Sada – Condenado a morte e fusilado o 27-11-1936
- José Germán Fernández – Alcalde de Santiago – Condenado a pena de morte e executado o 03-12-1936
- Alejandro Porto Leis – Alcalde de Serantes – Paseado a inicios de febreiro de 1938

Por outra parte, durante o réxime franquista a Deputación da Coruña outorgoulle a Francisco Franco Baamonde, entre outras honras e distincións as seguintes:

- Fillo predilecto da provincia, aprobado na sesión ordinaria celebrada o día 15 de xullo de 1939.
- Medalla do excombatiente galego, proposta de creación desta medalla na sesión ordinaria celebrada o día 31 de agosto de 1943.
- Nomeamento de Presidente de honra da Deputación da Coruña, aprobado na sesión extraordinaria celebrada o día 15 de febreiro de 1944.
- Ratificación do nomeamento de Presidente de honra da Deputación da Coruña, aprobado na sesión extraordinaria celebrada o día 15 de xullo de 1945.

O exercicio da memoria histórica, o coñecemento da verdade, a xustiza, a reparación e rehabilitación das persoas perseguidas polo fascismo, son dereitos humanos fundamentais que temos como sociedade e obrigas que adquirimos coas vítimas e a as súas familias.

A pesar de transcorren máis de 40 anos do final da ditadura e da restauración do réxime democrático, o Estado español carece dunha auténtica política pública da memoria que permita o coñecemento da verdade histórica, a reparación e rehabilitación das vítimas, o exercicio da xustiza e a suspensión da fenda e das feridas físicas e morais causadas polo levantamento militar e a ditadura. Así aparece recollido no informe do relator da ONU para os dereitos humanos, Pablo de Greiff, que pon de manifesto as eivas, carencias e obrigas do Estado español en relación con esta materia.

O Pleno da Deputación da Coruña do 30 de decembro de 2015 aprobou unha moción con motivo do 80 aniversario do inicio da Guerra Civil Española. Nesta moción expresouse a condena da Deputación da Coruña e o rexeitamento, sen paliativos, do golpe de Estado de xullo de 1936 que deu inicio á represión, así como da ditadura do xeneral Francisco Franco imposta tras a contenda.

Con motivo do 80 aniversario do golpe de Estado militar contra o réxime democrático vixente no Estado español, a Deputación da Coruña desenvolverá o 28 de xullo un acto de homenaxe aos alcaldes e membros das corporacións municipais que padeceron a represión tras o golpe militar de 1936, personalizando esta homenaxe no presidente e vicepresidente da Deputación da Coruña, José López Bouza e Ánxel Casal, asasinados despois do golpe militar e nas persoas que ocuparon as alcaldías de cidades e vilas da provincia da Coruña arriba nomeadas.

Por todo isto, e en cumprimento da Lei da Memoria Histórica 52/2007 a Deputación da Coruña, reitera a súa condena ao golpe de estado perpetrado por Franco o 18 de xullo de 1936, ao réxime ditatorial consecuencia deste golpe de estado e aos crimes e represión exercidos sobre as persoas vencidas.

A Deputación da Coruña reitera, asemade, a importancia de proseguir coas accións dirixidas a recuperar e dignificar a memoria das vítimas da represión exercida despois do golpe militar de 1936, eliminar os símbolos, as denominacións e as referencias franquistas de rúas e edificios públicos.

Por outra parte, a Deputación da Coruña declara a vontade de eliminar, suprimir ou anular todas as honras e distincións concedidas pola Deputación Provincial da Coruña a Francisco Franco Baamonde.